

UNNE TERUKBLIK... DOOR MAUD



Os mam waerdje gebeldj door PeePee det ich waas oetgekoaze as Jeugdprinses. Ich waas kei-blij, mer ich mos ut geheim haoje. Det is veul lestiger asse zoots dinke. Toen kwoom de daag van de oetrooping. Eederein leep in polonaise en minse moste kaertjes trekke. Daomet kwoome ze nao veure en de aod Prins en Prinses moste vlegskes van foto's van Len en mich aaf haole. Auch waerdje twieë nuuj borde onthuldj veur in de haof. Auch waerdje van de Scouting ein bord inne haof gezatte.



Os motto waas:

"Nao de sjoel kinne wae fluite, mer met Vastelaovendj zeen wae neet te stuite!"

Wae ginge auch nao angere recepties zoas die van Ell, Hunsel, Heibloom en Stramproy. Dao kreege wae allemaal ongersjei-inge. Oos eige receptie waas auch erg leuk met Sjing Boem en alle Raode van Ellef oet de buurt. Auch kreeg eederein ein ongersjei-ing.

Wae ginge auch nao de Sleuteleuverdracht. Wae hubbe met Big Benny oppe buhne gestange en wae kreege weer ein ongersjei-ing. Ut waas ein gezellige aovendj met vastelaoves meziek.

Met Vastelaovendj zelf waas der spek met eier en toen waas de jeugd aan ut taofel voetballe. Bij ut Piratenfestijn moogdje Len en ich eemes oet keeze dae ut sjoeanste verkledj waas dae aovondj.

Biej de Bontje Aovendj waas ut gezellig en grappig. Ich deej zelf auch veur de ieërste kieër met en det waas best waal spannendj. Gelukkig stong ich neet allein oppe buhne.



De veurbereidinge veur de optocht woore auch leuk. Len en ich moogdje ut snuik veur-preuve en de aojers moogdje de ker versiere. Veur de optocht is de hieële Raod van Ellef bij os toes spek met eier komme aete. Met de optocht moogdje wae allemaal snuik nao de minse goeaje.



Ut waas waal jaomer wie-det de Vastelaovendj veurbie waas; ut waas ein hieële sjoeanne en gezellige tieëd.

